

Chacun se dit ami ; mais fou qui s'y repose :
Rien n'est plus commun que ce nom,
Rien n'est plus rare que la chose.

L'AMICHTÉ.

Nos-avans tortos conu, on djoû ou l'ôte, dès momints qui tot toûrneûve rond, qui tot ç' qui s' passe autoû d' nos s'arindjeûve tot seû. Su l' momint, i chone qu'i c'è-st-insi qu'i faut qu' ça vauye, qui ça n' pôreûve nin aler ôtrumint. One miète come si tot ça aureûve yeû stî scrît d'avance su ç' qui nos lomans voltî nosse planète.

Avoz d'dja vèyu one saquî si d'mander dovint qu'il è-st-en boune santé dispû todi quand on vwèt tant dès malèrèûs qu'ont v'nu au monde avou one masse di rascrauwes ?

Portant, ni onk ni l'ôte n'a à s' vanter èt co mwins' à s' chapitrer di ç' qu'a sorvinu à l'astchèyance. Vos dîroz tot ç' qui vos vôroz, li cia qu'a fait lès paurts, il a tot l' min.me falu qu'i tape on fameûs côp à gaye po spaude one parèye injustice.

C'è-st insi qui l' musique va parèt, èt nos n'î saurans rin candjî, s'apinse lès djins.

Maugré tot, mwints côps, dji m' dimande si gn-aureûve nin moyin, tènawète, di coridjî d'on p'tit côp di spale, ci qui l' bon Diè n'a nin yeû l' timps d' fignoler.

Purdans one bauchèle, one djin d' nos djins, èt mètans lî one raquète di tènîs' è s' mwin. Èle n'a qu'à gangnî saquants côps d' sûte èt vo-l'la o mitan d'one masse di soçons qui frint tot po l' sot'nu.

Li roufion do viladje qu'a l' dâr do couru à vélo, i s'a v'nu mostrer trwès côps dins lès dîs prumîs èt vola qu' gn-a pus qu' por li, tot l' viladje èst là, à totes sès coûsses.

Li p'tit glawine gamin, qu'a fait arèdjî l' maïsse dès-anéyes au long, qu'a stî ègadjî po djouer on p'tit role dins on film qu' on-z-a v'nu toûrner aaur-là, on 'nn'a fait tot-d' sûte one vèdète.

Li fi dau cantonier, qu'a douviè one botcheriye à s' compte, èt qu'on dîreûve qu'on-z-î done tot po rin, i n'a qu' dès soçons autoû d' li, surtout à l' trwèzyin.me mitan, quand i paye si toûrnéye gènèrale au fotbal.

Qué bouneûr di veûy qui tot va bin, qu'on n' si plind nin, qui tot-autoû d' vos, vos n'avoz qu' dès soçons.

Malèrèûsemint, pa côps, èt sins soyu poqwè, il arive co bin qui l' vint toûne.

Èt lès soçons ossi, i toûnenut. Leû casaque, zèls.

Ci côp ci, ci n'èst pus tot-à-fait l' min.me aîr :

Quand on vout djouer au tènîs', i faut d' pus d' coradje qui ça, èt fé one crwès su lès galants !

A vélo, c'èst tos lès djoûs qu' faut gangnî s' mitche, èstô di s' veûy au toû d' France pace qu'on-z-a gangnî quate coûses di dicauce.

Po fé do cinéma, i faut on-ôte sicoladje qui ça, on l' saveut bin don, qu' ça n'îreûve nin pus lon qu' ça.

Li pôve botchî, li, s'il aûreûve yeû v'lu, il aveûve tot dins sès mwins po rêyussi, mins il a byin vèyu trop grand ; èstô d' fé l' mariole à payî dès vères aus céns qui s' foutenut d' li, il aûreûve bran.mint mia valu qu'il aureut yeû r'waîfî à s' feume qu'a lèvé l' pèton avou l' gârçon d' botchî.

Tot ça po dîre qui, quand tot va bin, lès soçons aboulenut tot seûs, come dès wèsses su one pwâre trop meûre.

Mins si par maleûr, li vint man'cîye di toûrner, c'èst co pus rade qu'i sèront lès prumîs à d'sârter.

C'è-st-adon qu' vos vièroz èvou qu' 'l èst l' neûd, s'apinse li soyeû. Gn-a dès chances qui v's-auròz assez avou lès dwègts d'one mwin po lès compter, lès camarâdes qu'i vos d'meûrrè.

Mins cètila, eûchîz-è sogne, pace qui ça, c'èst ç' qu' on lome dès vrais soçons.

On vraî soçon, i n' vos juge nin, i vos prind tél qui v's-èstoz.

I vos choûte ossi longtims qu'i faurè, sins vos rin d'mander ;

I n' vos donne si-t-avis qui si vos l' v'loz soyu.

I vos laît tranquile pace qu'i vwèt qu' vos vôrîz bin tûzer.

Si vos l' v'loz uker, il èst là.

Il èst l'prumî èt l' dêrin à vos disfinde èt fé taîre lès linwes d'aspic.

Por li, on côp di spale ni d'mande pont d' mèrci.

On vraî soçon, c'è-st-one saqwè d' fwârt râre, èt come tot ç' qu' èst fwârt râre, c'è-st-one saqwè qu' vos n' saûrîz payî.

Quand on cause di soçons, au pus sovint, on sondje à dès-omes ; dji n' vos saureu dîre poqwè. Mins ç' qui dj'è so sûr, c'èst qui, si v's-avoz l' chance qu'i gn-eûche one feume qu'è faîye pârtiye, c'èst seûlemint qu'il î faut r'waîfî, pace qui, à lèye tote seûle, èlle è vaut bin deûs, vos m' ploz bin crwêre.

Albert DELVAUX

à l'astchèyance : par hasard

Awè l' dâr : être entêté

Chapitrer : sermonner

èstô : au lieu de

Glawine : espiègle

Lèver l' pèton : partir

Rascrauwe : malheur

Spaude : répandre

Tènowète : de temps en temps